


## SKANDINAVSKA TURNEJA

# Tražila se karta više

Zerina Cokoja i Enes Begović oduševili Bosance u Švedskoj i Danskoj

Iako nije uobičajeno da se često sastaju i to još zajednički "otisnu" na najveću turneju dva muzički "suprotstavljena" pjevača, narodnjak i zabavnjak, ovoga puta se to pokazalo učinkovito.



Zerina Cokoja i Enes Begović

Nekada najljepša i još uvijek lijepa **Zerina Cokoja** i **Enes Begović** protekle dvije nedjelje održali su deset veoma uspješnih koncerata širom Danske i Švedske. Dvorane i klubovi na ovoj turneji od Kopenhaga, Malmea, Geteborga, Štokholma i drugih gradova, bile su prepune, a to pokazuje da je naša dijaspora još uvijek "žedna" bosanskog

melosa i da želi biti u trendu svih muzičkih zbivanja.

Snježne padavine koje obasipaju ove prostore i poprilična hladnoća koja vlada, okomili su se na Zerinu nekim "virusom", pa je morala pred koncert u Malmeu potražiti čak i liječničku pomoć. No, sve to nije bitnije uticalo da prepuna dvorana (skoro duplo više od "optimalnog" broja) istinski uživa u njoj pjesmi. Mnogima su se "filmovi" vratili na jednu deceniju unazad, a sentimentalne pjesme zaokružile ionako idiličnu pretprazničku atmosferu zaodjenu snježnim pokrivačem.

Enes se pokazao kao pravi profesionalac, pjevač koji u "sekundi" može dići na noge cijelu dvoranu i da je ne samo kompletan muzičar, već i šarmantni zabavljač. Neposredno pred koncert u Malmeu, Zerina i Enes su bili gosti i bosanskohercegovačkog Radija-Malme (koji iza

sebe ima 310 emisija "uživo") i u direktnom programu razgovarali sa mnogobrojnim slušaocima, podijelivši i nekoliko besplatnih ulaznica.

Ekipa koja je uz organizatora ove turneje **Vahida Kape** i orkestra **Modra Rijeka** nadopunjena jednim od vodećih bh. harmonikaša **Elvedinom Elom Muhićem**, "špartala" je na hiljade kilometara, ali se i hvatila neiscrpnim **Begovićevim** humorom koji im je za ovo vrijeme prepričavao preko hiljadu "novih" viceva.

No, oko noviteta vezanih za Enesa Begovića, doznali smo da uz najavu njegovog novogodišnjeg nastupa u Tuzli priprema i novi muzički projekat. Biće to uskoro, a u studio će ući već u januaru naredne godine.

Kod Zerine sve je još tajnovito, pa čak i njene namjere da se "definitivno" vrati u Sarajevo. Ipak, između redova doznajemo da joj osim muzike ni biznis nije stran, jer je na pomolu njeno osnivanje izvoznog preduzeća, ali i zastupništvo jedne firme će biti pod Zerininim patronatom. Do sada je nekoliko puta "skoknula" na relaciji Minhen-Bosna, ali izgleda da se sprema uskoro tu relaciju i definitivno preskočiti. Ipak, izgleda da svi putevi bh. estrade neminovno vode preko vijugavih inostranih turneja.

M. PERVIZOVIĆ

## AMELA ŠEHOVIĆ



## Uskoro u novom izdanju

Iduće sedmice u izdanju produkcije *Halix* pojavice se drugi audioprojekat Amele Šehović pod nazivom *Čigra*. Devet vrlo dopadljivih melodija nastalo je u muzičkoj ordinaciji autorskog tima kojeg su sačinjavali **Zaim Poturić**, **Avdo Huseinović**, **Samir Zavlan**, **Zejnir Halilović**, **Admir Beganović** i **Šekib Kalaba**.

- Ako kažem da je ovaj materijal u odnosu na prethodni bolji sto puta, reći će te da sam neskromna. Međutim, sudeći prema brojnim pozivima radio i TV stanica vezanim za učešće u njihovim novogodišnjim programima onda, konačno, mogu reći da imam materijal koji mi omogućava da se na putu do estradnog trona popnem za stepenicu više, kaže Amela Šehović.

MUZIČKI IZLOG

GDJE SU, ŠTA RADE